



Davo lung temp da progetaziun e fabrica vain la nouva Punt d'En tanter Tarasp e Scuol surdatta in dumengia al trafic.

fotografia: Nicolo Bass

Als 10.10.2010, a las 10.10...

Avertüra da la Punt d'En da Tarasp/Vulpera a Scuol

D'utuon 2007 ha cumanzà la fabrica da la Punt d'En da Tarasp/Vulpera a Scuol ed in dumengia ha lö finalmaing la surdatta al trafic. Ün mumaint istoric ed important per Scuol, Tarasp e tuot la regiun.

NICOLO BASS

In dumengia, ils 10. 10. 2010, a las 10.10 esa finalmaing uschè inavant! La Punt d'En tanter Tarasp/Vulpera e Scuol vain surdatta al trafic. Ün mumaint istoric per tuot l'Engiadina Bassa. Ma impustüt la populaziun da Tarasp ha lönch bramà quist mumaint ed a partir da dumengia sun els ün pain pü dastrusch al rest dal muond. Quist fat vain festagià cun paucas e trumbettas, cun discuors e salüds, e cun rapreschantaziuns d'uffants e creschüts. Ils organisatuors da la festa impromettan üna festa istorica cun ün'avertüra inschmanchabla. Ün mumaint tuot special es l'avertüra da la Punt d'En eir per l'indschegner Nutal Peer. El es oriund da Ramosch e lavura a Cuaira illa ditte privata incumbenzada culla direcziun da fabrica. «Eu n'ha accompagna d'ürant tuot ils ons il fabricat da la punt e sun fich cuntaint cha la punt va averta», declera Peer. Per el es la fabrica d'üna punt eir üna rosina illa lavur d'indschegner, «ed impustüt schi's po manar la direcziun da fabrica d'ün proget uschè grond ed important.» E na be la dimensiun da la nouva punt es fascinanta, dimpersè eir il möd da cunstrucziun.

per la prosma etappa da fabrica. Ed uschè es la punt creschüda meter per meter. Davo duos ons da lavur da fabrica es statta terminada la mità d'october 2009 la lavur brütta. Per Nutal Peer es eir fascinant, cha tuot il material d'intabladüra ha pudü gnir dovrà duos jadas, nempe il prüm pro'l pilaster e'ls duos bratschs da la vart da Tarasp, ed in seguit per la listessa lavur da la vart da Scuol. Tras tuot la punt sun trats quatter cabels gross, tendüts cun raduond 400 tonnas al toc. Sco cha l'indschegner declera es la punt pozzada da tuottas duos varts sül terrain, in ün möd cha'l material po lavurar tuot tenor temperatura e movimaint. «Regularmaing vegnan fattas masüraziuns per tgnair suot controlla ils movimaints», declera Peer. Tuot la punt es 236 meters lunga e 9,3 meters largia ed ha cuostü 15,9 milliuns francs.

Tuot la fabrica sainza accidaints

Nutal Peer es fich cuntaint cha tuot il fabricat ha pudü gnir realisà tenor plan da termins e tenor calculaziun da cuosts. Quai conferma eir Peter Stirnimann, respunsabel per la lavur publica da l'Uffizi chantunal da construcziun bassa, ch'id es stat eir patrund da fabrica da la nouva punt. Ma amo plü important es per Stirnimann e per Peer cha tuot il fabricat ha pudü gnir manà tras sainza ün accidaint.

Cull'avertüra in dumengia va per Nutal Peer a fin üna lavur fich interessanta ed impreschiunanta. El as dedicha in avegnir darcheu ad oters progets in tuot il chantun Grischun. Però

il fabricat da la Punt d'En til restarà adüna in buna memoria ed el es superbi d'avair pudü lavurar activa maing vi da quist fabricat impreschiunant e tecnicamaing interessant. A la fin d'eira la Punt d'En eir adüna ün bun mötiv per tuornar in sia patria, l'Engiadina Bassa.

Program da festa

Il chantun Grischun e'ls cumüns da Tarasp e Scuol invidan in dumengia, ils 10 october, a la festa d'avertüra da la nouva Punt d'En tanter Tarasp e Scuol. Il program cumainza a las 09.30 cun ün cortegi davent da la staziun da la Viafier retica Scuol-Tarasp vers la punt d'En Vulpera. A las 09.50 cumainza la cerimonia d'avertüra sülla punt cul act uffizial a las 10.10. Preschaints sun sper ils capos cumünals da Scuol e Tarasp eir il cusglier guvernativ Stefan Engler ed il manader da l'Uffizi chantunal da construcziun bassa Heinz Dicht. A las 10.45 ha lö ün aperitiv e'ls plets festivs davant l'Hotel Schweizerhof. Bavrondas e mangiativas as survain pro'ls differents stands sülla piazza da festa. Al cortegi e las festivitats as partecipeschan sper las scoulas da Scuol e Tarasp, eir las societads da musica da Scuol e Tarasp, la gruppa da tübas indigena ed üna gruppa cun musica da trategnimaint. Ils organisatuors giavüschan da dovrar il trafic public fin pro la staziun o da parcar ils autos sülla piazza da parcar da las pendicularas a Scuol. (nba)